

## DOMENIE VII «VIE PAL AN»

### Antifone di jentrade Sal 12,6

**I**ntal to boncûr, Signôr, o ài vude fede;  
che si indalegri il gno cûr te tô salvece.  
I cjantarai al Signôr che mi à judât.

### Colete

Diu onipotent, danus la gracie  
di meditâ simpri ce che al è just,  
par podê fâ, cu lis peraulis e cu lis voris, lis robis che ti plasìn.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Lv 19,1-2.17-18

*Tu amarâs il to prossim come te in persone.*

Dal libri dal Levitic

Il Signôr i fevelà a Mosè e i disè: «Disii a dute la comunitât dai fîs di Israel: Viodê di jessi sants,  
parcè che jo, il Signôr, il vuestri Diu, o soi sant.

No sta vê asse tal to cûr cuintri di to fradi; fasii al to prossim une corezion su la muse, cussì no tu ti  
cjamarâs di un pecjât par vie di lui. No sta cirî svindics e no sta tignî rusins cuintri dai fîs dal to  
popul, ma tu amarâs il to prossim come te in persone. Jo o soi il Signôr».

Peraule di Diu.

### SALM RESPONSORIÂL dal Salm 102

**R.** Il Signôr al è bon e grant intal amôr.

Benedis, anime mê, il Signôr,  
dut ce che al è in me il so non sant al benedissi.

Benedis, anime mê, il Signôr,  
e no sta lassâ in dismentie nissun dai siei plasês. **R.**

Lui ti à perdonadis dutis lis tôs colpîs,  
ti à vuarît di ducj i tiei mâi;  
al à tirade fûr de buse la tô vite,  
ti à incoronât di boncûr e di gracie. **R.**

Bon e di boncûr al è il Signôr,  
pegri tal inrabiâsi e grant tal perdonâ lis colpîs;  
no nus à tratâts daûr dai nestris pecjâts;  
no nus à paiâts daûr des nestris colpîs. **R.**

Come che al è lontan dal amont il jevâ dal soreli,  
cussì al à slontanât di nô lis nestris colpîs.

Come che un pari al à dûl dai siei fîs,  
cussì il Signôr al à dûl di chei che lu rispîetin. **R.**

### SECONDE LETURE 1 Cor 3,16-23

*Dut al è vuestri, ma vualtris o sês di Crist e Crist al è di Diu.*

De prime letare di san Pauli apuestul ai Corints

Fradis, no savêso che o sês templi di Diu e che il Spirt di Diu al è a stâ in vualtris? Se un al bute jù  
il templi di Diu, Diu lu butarà jù lui. Parcè che al è sant il templi di Diu, che o sês vualtris.

Nissun nol à di fâsi ilusions. Se fra di vualtris cualchidun al crôt di jessi sapient in chest mont, che si fasi mat par diventâ sapient. Parcè che la sapience di chest mont e je matetât denant di Diu. Di fat al è scrit: “Lui al brinche i sapients midiant de lôr furbetât”. E ancje: “Il Signôr al sa che i progjets dai sapients no son nuie”.

Duncje nissun nol à di poiâ la sô glorie sore dai oms; parcè che dut al è vuestri: Pauli, Apol, Chefa, il mont, la vite, la muart, lis robis che a son, lis robis che a vignaran, dut al è vuestri. Vualtris però o sês di Crist e Crist al è di Diu.

Peraule di Diu.

### **CJANT AL VANZELI cf. Zn 6,63.68**

**R.** Aleluia, aleluia.

Lis tôs peraulis, Signôr, a son spirt e vite.

Dome tu tu âs peraulis di vite eterne.

**R.** Aleluia.

### **VANZELI Mt 5,38-48**

**Amait i vuestris nemîs.**

Dal vanzeli seont Matieu

In chê volte, Jesù al disè ai siei dissepui: «O vês sintût che al è stât dit: “Voli par voli e dint par dint”. Jo us dîs invezit di no resisti al trist; anzit se un ti pete de bande diestre de muse, voltii ancje chê altre. A un che al vûl strissinâti in tribunâl par puartâti vie la vieste, dai ancje la manteline; se un al vûl obleâti a fâ une mie, va cun lui par dôs miis. Se un ti domande, dai; se un ti domande alc ad imprest, no sta voltâi lis spalîs.

O vês sintût che al è stât dit: “Tu amarâs il to prossim e tu odearâs il to nemî”. Jo us dîs invezit: amait i vustris nemîs e preait par chei che us perseguitin, par che o sedis fîs dal Pari vuestri che al è tai cîi, che al fâs jevâ il so soreli sui triscj come sui bogns e al fâs plovi sui juscj come sui injuscj. Di fat se ur volês ben dome a di chei che us vuelin ben, ce ricompense varessiso di vê? No fasino compagn ancje i publicans? E se o saludais dome i vustris fradis, ce fasêso di speciâl? No fasino cussì ancje i paians? Vualtris duncje o varês di jessi perfets come che al è perfet il Pari vuestri che al è tai cîi.

Peraule dal Signôr.

### **Su lis ufiertis**

Celebrant i tiei misteris cul rivuart che a mertin,

ti prein, Signôr,

che al zovi pe nestre salvece

ce che o ufrin in onôr de tô maiestât.

Par Crist nestri Signôr.

### **Antifone a la comunion Sal 9,2-3**

O vuei contâ dutis lis robonis che tu âs fatis.

O vuei jessi content e plen di ligrie,

o vuei cjantâ il to non, Altissim.

### **O ben: Zn 11,27**

Signôr, jo o ài crodût che tu tu sês il Crist,

il Fi dal Diu vîf, chel che al à di vignî tal mont.

### **Daspò de comunion**

Diu onipotent, danus par plasê di rivâ a chê salvece

che midiant di chescj misteris

o vin vude la capare.  
Par Crist nestri Signôr.